

華嚴經普賢行願品疏卷四

唐罽賓國三藏般若奉詔譯 澄觀述疏

◎妙住比丘章

△第三妙住比丘寄修行住。謂巧觀空有，增修正行故。餘如前說。文亦具六。

爾時善財童子隨順思惟善知識教，專心憶念普眼法門。專念如來神變威力，憶持微妙法句身雲，趣入無邊法門教海。觀察善友威儀法式，游泳甚深法海漩復。普徧趣入虛空法界，淨治法眼所有翳障，摺拾善友所集法寶。

第一依教趣求中二。先念前友教。文中十句。初二句總。後專念如來下，別。別中初三句思前觀成利益。初句見佛。次句聞法。後句受持。次二句思前觀海。後三句通明證理治障，攝法觀修。

如是作意，漸次南行，至楞伽道海岸聚落。觀察十方，周徧求覓妙住比丘。

後如是作意下，趣求後位。

見彼比丘在虛空中，經行來往。不思議數諸淨居天與宮殿

俱，於虛空中恭敬合掌，發弘誓願而為供養。不思議數諸梵天王，曲躬合掌，出妙音聲，以人間法稱揚讚歎而為供養。無數千萬欲界諸天及諸天王，恭敬圍繞，滿虛空中布天華雲，雨天華雨，作天伎樂，出妙音聲，無數繒綺寶幢旛蓋，種種嚴飾，悉徧虛空而為供養。復有無數諸大龍王，於虛空中興不思議沈水香雲，普徧虛空，震雷激電而為供養。無量不思議數諸夜叉王，各以眷屬周匝圍繞，恭敬守護而為供養。無量不思議數諸羅剎王，與諸眷屬，其形長大，甚可怖畏，咸起慈心，親近瞻仰而為供養。無量阿脩羅王，興不思議摩尼寶雲，放大光明，徧滿虛空，雨種種寶，莊嚴照耀而為供養。無數迦樓羅王作童子形，諸妙采女之所圍繞，起大慈愍，無殺害心，恭敬合掌而為供養。無數緊那羅王拊擊眾樂，演出種種微妙音聲，復以種種

稱法言辭歌詠讚歎而為供養。無數摩睺羅伽王持不思議上妙微細天諸衣服，親近隨逐，周迴布列而為供養。無量主海神作諸伎樂，嘯和雅音而為供養。

第二見彼比丘下，見敬諮問。於中三。初見。

善財童子見此比丘於虛空中經行自在。復有如是供養之事，充滿虛空。歡喜踊躍，不能自持。五體投地。一心敬禮。良久乃起。

次善財童子見此下，設敬。

合掌白言，聖者，我已先發阿耨多羅三藐三菩提心。

後合掌白言下，諮問法要。於中二。先自陳發心。

而未知菩薩云何勤求佛法。云何積集佛法。云何滿足佛法。
。云何熏習佛法。云何修行佛法。云何淨治佛法。云何隨
順佛所行法。云何通達佛算數法。云何增長佛普徧法。云
何清淨佛究竟法。云何總攝佛功德法。云何能入佛隨順法
。

後而未知下，正陳請問。於中三。初總問。於法起行，
故云佛法。通於教理行果等法。梵本舊經佛法二字皆居

其末。

我聞聖者善能誘誨。唯願慈悲，為我宣說。

二我聞下，結前生後。

菩薩云何恆見諸佛，聞法勤修而不捨離。菩薩云何恆同一切菩薩善根而不捨離。菩薩云何恆以智慧證諸佛法而不捨離。菩薩云何恆以大願饒益眾生而不捨離。菩薩云何恆修一切菩薩事業而不捨離。菩薩云何恆住劫海，修行無厭而不捨離。菩薩云何恆住剎海，普徧莊嚴而不捨離。菩薩云何恆依佛力，悉能知見諸佛神變而不捨離。菩薩云何恆於

六趣自在受生，住無住道而不捨離。菩薩云何恆受諸佛正法雲雨，悉能憶持而不捨離。菩薩云何恆發智光，普照三世佛所行處而不捨離。唯願慈哀，為我開演。

三菩薩云何恆見下，別問起行勝用。有十一句，所行各別。初三不離三寶行。次三不捨二利行。次二攝佛依正行。次一悲智無住行。後二攝法證入行。皆以上恆字貫下不離，無暫捨也。

△第三爾時妙住下，稱讚授法。於中二。先讚。後授。

爾時妙住比丘告善財言，善哉善哉，善男子，汝已能發阿耨多羅三藐三菩提心，今復志求一切智法及自覺法。

今初。先讚發心勝。後讚問法勝。二經皆有總句云佛法。佛法通於教理行果。一切智法，別明果法。及自覺法，通理行果。自覺聖智，通此三故。

善男子，汝能發心，深信愛樂，殷勤不捨，請問於我。汝當諦聽，今為汝說。

後善男子汝能下，授法。於中二。先讚問誠聽。

△後善男子我得下，正授法要。於中三。一總標名體。二修習得法。三辨法功用。

善男子，我得菩薩普遍速疾勇猛不空供養諸佛成熟眾生解脫門。

今初。此名是下謙己中名，從用以立。梵本此云我得無著解脫門。舊云無礙。今此總名後得法中。

常於此門若行若止，修習思惟。或入或出，隨順觀察。即

時獲得智慧光明，名普照諸法究竟無礙。

二常於此門下，修習得法，由四威儀，順法思修，故能獲得。言無礙者，略有二義。一者智慧於境無礙。由證無礙真法界故，故云智慧光明。二者神通作用無礙。由內證故，不礙於境。供佛化生，不空所作。如前名中。

△三由得如是下，彰法功用。於中具十通用。文分為三。初總明通智之用。次總相徵釋。後別明通變之用。

由得如是智光明故，知諸眾生種種心行無所罣礙。知諸眾生種種歿生無所罣礙。知諸眾生宿住之事無所罣礙。知諸眾生未來劫事無所罣礙。知諸眾生現在世事無所罣礙。知諸眾生種種言音隨俗差別無所罣礙。知諸眾生種種疑網，咸為決了無所罣礙。知諸眾生種種根性受法差別無所罣礙。知諸眾生應受化時，悉往調伏無所罣礙。知諸時分，剎那臘縛，牟呼栗多，晝夜年劫，延促相入無所罣礙。知三世海諸法流轉相續次第無所罣礙。知諸佛剎無量差別，能以其身徧往十方無所罣礙。

今初。有十二句，具十通智。小有開合。初一他心通智。二三皆宿住通智。前句本生，後句本事。四即未來際

劫通智。五天眼通智。經說天眼見現在故。六具二通智。一天耳通，約聞一切音聲。二分別一切眾生言音通智，約聞言詞。今經之中，言當言詞，音當音聲。故梵本云種種祕密語言音聲。以同一天耳，開之成二。故今合之。七八及九並一切法通智。一斷疑智。二知根智。三知時智。此三並是化生之智。十及十一並一切法滅盡通智。前句知剎那盡。後句長時流轉盡。十二即無體性神通，及無量色身莊嚴通智。此二俱是神境開出。下復廣說。故此合耳。十通文顯。唯時分智，今當略說。時分總名，該於長短。時之極促，名曰剎那。百二十剎那名

恒剎那。六十恒剎那為一臘縛。三十臘縛為一年呼栗多。三十年呼栗多為一晝夜。餘時可知。然仁王經一剎那中九百生滅。今不說者，一以剎那之中，更有生滅。唯佛智知。故略不說。二顯於剎那剎那生滅即無生滅，是性寂滅，稱滅盡智。得此性滅，不礙起用。異乎二乘盡滅之滅。若約表者，此位菩薩觀察地水火風等界，故成智慧作用自在。

何以故。以得無住無作無行神通力故。

二何以故下，總相徵釋。然有二意。一徵釋前十所以。前十得無礙者，皆由無住等通力故。以無住故，無所不住。以無作故，作用無邊。以無行故，用而常寂。若約表義，即修行菩薩觀一切法空無我等，得此自在。二者別相徵釋最後一句，所以得身徧十方者，無體性通，無作無行力所成故。故此一段是結前生後。然其十通，但開於六，以成圓數。謂一以天眼約見現未，分成二相。天眼見現，加未來劫。二天耳約聞音聲言詞，分為二相。今文合之。三以神足約於業用及現色身，分成二相。今文亦合。四以漏盡約盡定慧二種障故，分為二相。定

即滅盡智通。慧即一切法智通。上四各二，故成八種。
他心宿住，此二不分。故有十耳。十智皆通，故判為智。

善男子，我以得此神通力故。於虛空中，或行或住，或坐或臥，乃至現作種種威儀。隱顯自在。或以一身分為多身。或以多身合為一身。或以其身來往入出，穿度石壁而無障礙。或於空中結跏趺坐，自在往來，猶如飛鳥。入地如水，履水如地。徧身上下，普出煙燄。光明熾盛，如大火聚。或時震動一切大地。或時以手捫摸日月。或現威德超自在天。或現大身過於梵世。或以神力轉變自在。或現燒香雲，盤旋如蓋，彌覆十方。或現寶燄雲，光明熾盛，普

照一切。或現變化雲，其身隨類，等眾生界。或現光網雲，具足眾色，映徹無礙。或現其身，於一念頃，過於東方一世界，十世界，百世界，千世界，百千世界，億世界，百億世界，千億世界，百千億世界，百千億那由他世界，乃至無數世界，無量世界，無邊世界，無等世界，不可思世界，不可量世界，不可稱世界。不可說世界，不可說不可說世界，乃至或過閻浮提極微塵數世界，乃至過不可說不可說佛剎極微塵數世界。如是一切世界海中所有的一切世界出生中，一切世界方處中，一切世界旋轉中，一切世界普徧中，一切世界變化中，一切世界名字中，一切世界法門中，一切世界時劫中，一切世界微細中，一切世界菩提場中，一切世界莊嚴具中，一切世界大眾會中。如是一切種種世界，其中所有一切剎土，皆有如來現成正覺。彼諸

如來一一復現一切佛刹極微塵數大眾集會差別之身。我悉於彼一切佛所，普現其身。於一一身，普雨一切諸佛刹海極微塵數諸供養雲。所謂一切華雲，一切香雲，一切鬘雲，一切蓋雲，一切幢雲，一切幡雲，一切帳雲，一切網雲，一切末香雲，一切塗香雲，一切衣服雲。以一切身各持如是諸供具雲而為供養。一一如來所轉法輪種種宣說，所謂廣說略說，讚說毀說，明了說隱密說，有餘說無餘說，不定說決定說，我皆悟解，憶念受持。一一國土諸佛刹海所有莊嚴，我皆憶持，曾無忘失。如於東方，南西北方四維上下，亦復如是。善男子，如是一切諸世界中所有眾生，若聞我名，若見我身，或覩經行止住之處，或以一心禮拜供養，或時散亂懷疑不信，如是一切皆決定於阿耨多羅三藐三菩提得不退轉。彼諸世界一切眾生，我皆明見。隨

其大小勝劣苦樂，示同其形。隨所應度，教化調伏而成熟之。隨有眾生親近我者，悉令安住如是法門。

第三善男子我以得此下，別明通變之用。初句牒前，即牒最後。於虛空下，正顯用相。謂十八變。文具有之。一於虛空中至種種威儀，即所作自在。二隱，三顯。舊經梵本云或隱或顯，知二相別。今云隱顯自在，乃合二變以為一句。四或以一身分為多身，是舒。五或以多身合為一身，即卷。六或以其身往來下，明往來。七徧身下，熾然。八或時震動一切大地，即是震動。九或時以

手下，制他神通。以超自在過梵王故。十或以神力轉變自在者，轉變。十一或現寶燄雲下，流布。十二或現變化雲下，同類往趣。十三或現光網雲下，放大光明。十四或現其身於一念頃下，示現。十五於一身普雨一切諸佛刹海下，眾像入身。文雖言出，必能入故。故最後云以一切身持諸供具。十六一如來所轉法輪下，施他辯才。以能憶持佛所說故。十七善男子如是一切下，施他安樂。謂見身聞名，令無散亂，身心輕安，乃至菩提覺法樂故。十八彼諸世界一切眾生下，施他憶念。憶念善友此法門故。餘如瑜伽三十七說。

善男子，我唯知此普徧速疾勇猛不空供養諸佛成熟眾生無礙解脫門。

第四善男子我唯下，謙己推勝。先謙己知一。一念徧往，故云速疾。現形益物，為不空等。

如諸菩薩摩訶薩具足受持大慈悲戒，波羅蜜戒，住大乘戒，不離菩薩道戒，不著一切法戒，不捨菩提心戒，不墮二乘地戒，常以佛法為所緣戒，心常憶念一切智戒，所發志樂等虛空戒，一切世間無所依戒，不缺漏戒，不濁亂戒，無遺失戒，不雜染戒，不追悔戒，無厭怠戒，清淨戒，離塵戒，無垢戒。如是菩薩戒行功德無量無邊，而我云何能

知能說。

後如諸菩薩下，推勝知多。而皆明戒者，彰知所得無礙解脫，由持如來別解脫戒為依地故。前吉祥雲法門是定。海雲是慧。此中明戒。具足三學。如天三光，如鼎三足，闕一不可。入菩薩道，先此三故。非戒不能修心行故。有二十戒，即第十迴向二十梵行。但彼約於自能清淨，方能淨他。故先護重，首明不破不缺等行。此彰菩薩本為利他。故先大悲，後顯無垢。名或小異。今當略會。一大悲戒，即彼二十無恚梵行。恚是悲障，有悲故

無。二波羅蜜戒，是第十一三世諸佛所行梵行。佛之道故。三住大乘戒，即第十七無比梵行。餘乘無對故。四不離菩薩道戒，即十八無動梵行。不動二利故。五不著一切法戒，即十三無著梵行。由見真如，成聖道故。六不捨菩提心戒，即十六安住梵行。心詣理故。七不墮二乘地戒，即十五無滅梵行。順理而行，則常不滅。不同二乘起心持戒，有滅盡故。八常以佛法為所緣戒，即十四無諍梵行。事理具足，無非佛法。何所諍哉。則常緣矣。九心常憶念一切智戒，即第七諸佛所讚梵行。稱理持戒，動契聖心。是緣佛智。佛何不讚。十所發志樂等

虛空戒，即第九無所得梵行。不得能所，自在持故。十一一切世間無所依戒，即第八無所依梵行。不依現世名聞利養，不求當世人天果故。十二不缺漏戒，即第二不缺梵行。不犯十三等無殘缺故。十三不濁亂戒，即十九無亂梵行。定共相應故。十四無遺失戒，即第五無失梵行。定心持戒，吉羅不犯故。十五不雜染戒，即第三不雜梵行。不念破戒種種因緣，聞環釧聲亦不染故。十六不追悔戒，即十二無礙梵行。犯罪追悔，是障礙故。十七無厭怠戒，即第六無能蔽梵行。當持無厭，緣不能蔽。鵝珠草繫，持不壞故。十八清淨戒，即第十增益菩薩

清淨梵行。不同小乘唯事淨故。十九離塵戒，即第四無點梵行。不犯墮罪，無塵點故。二十無垢戒，即第一不破梵行。若犯四重十重，猶如破器，無所復用，最垢重故。略為此釋，似有憑據。亦順智論十種戒文，恐繁不

會。
善男子，從此南方有一國土，名達邏比吒。其國有城，名金剛層。中有大士，名曰彌伽。汝往彼問，菩薩云何學菩薩行，云何修菩薩道。

第五善男子從此下，指示後友。即生貴住善友。國名達

邏比吒者，唐言持富饒。從聖教等之所生故，為貴為富。
。城名金剛層者，積集三世佛金剛句，重重高故。大士
名彌伽者，新云宜伽俱譯為雲。演輪字門，含潤雨法故
。修學三世佛法教雲，雨一切故。

時善財童子禮妙住足，右繞瞻仰，辭退而去。

第六時善財下，禮辭可知。

淨空法師專集網站(簡)製作